

6)

S O M M A I R E D U P R O C E S  
pendant pardeuant Messieurs tenans le grand Conseil du  
Roy à Paris.


Entre noble Dame Claude d'Aussouuilliers vefue de  
feu Messire François de Montmorency, viuant  
Cheualier, sieur & Baron de Hallot, Lieutenant  
& Gouverneur pour sa Majesté en Normandie,  
demanderesse en crime d'assassinat commis à la  
personne dudit deffunct son mary.

*Contre Matthieu de Beauuais sieur des Angles, prisonnier  
aux prisons du Conseil, accusé dudit crime, & deffendeur.*

**E**N la premiere circonstance du procez ledit  
defendeur a denié sa qualité de sieur des An-  
gles, comme il se void par arrest du Conseil  
du iour de 1614. laquelle à present ne  
doit estre remise en doute, parce qu'il l'a passée pour  
congneüe voyant qu'il ne la pouuoit plus debattre:  
mais s'ayde d'un autre artifice, disant qu'il y en a d'au-  
tre de ceste qualité de des Angles, & qu'un appelé  
Iacques Regnard son voisin porte ceste mesme qua-  
lité de des Angles; neantmoins ne veut dire si ledit  
Regnard a esté de la compagnie dudit Allegre. Et sur  
ce interrogé, de rechef dit qu'il persiste à ce qu'il a dit.

Par son interrogatoire qu'il s'est fait faire au Par-  
lement de Rouën lors qu'il fut constitué prisonnier,  
il a recongneu auoir assisté ledit sieur d'Allegre au-  
teur dudit assassinat à plusieurs voyages, tât à Diep-  
pe qu'à Gisors & ailleurs, mais qu'il n'estoit domesti-  
que ny à gages, disant qu'il n'a esté à Vernon où le-  
dit homicide a esté commis.

Estant interrogé quelle profession il faisoit lors





2

dudit assassinat, dit qu'il croit qu'il estoit en la maison de son pere, à ce qu'il croit toutesfois dit qu'il estoit en la maison de la damoiselle du Thil sa tante, neantmoins n'en veut rien prouuer, parce que ceux qui seruoient lors son pere, sont tous decedez.

Dit aussi que George son frere estoit page du sieur d'Allegre lors dudit assassinat à ce qu'il croit, & qu'o l'appelloit quelquesfois sieur des Angles, & les autres le sieur du petit Beauuais, & n'en met rien en fait, remettant plustost le tout en doute & à l'incertain.

Dit dauantage qu'il y a bien d'autres personnes qui se qualifient sieur des Angles que luy, mais estant interrogés s'il en a congneu quelques autres à la suite dudit d'Allegre que luy accusé, il n'en peut redre raison, & dit qu'il persiste à ce qu'il a dit.

Sur la remonstrance à luy faite qu'un appelé de Beauuais des Angles est chargé par le procez, & que n'y en ayant point d'autre de ce nom: il faut que ce soit luy accusé: a dit qu'il persiste à ce qu'il auoit dit, & ne peut autre chose respondre ny rendre raison.

Or est-il que pour iustifier que ledit des Angles est deuëment attainct & conuaincu dudit assassinat tout ainsi que ledit d'Allegre, & autres complices.

Ladite Dame pretend qu'il est rapporté par six temoins ouïs en l'information faite par l'autorité du Parlement de Normandie les 29. Septembre, 20. Octobre 1592. & 7. Ianuier 1593. que des Angles est l'un des complices dudit inhumain assassinat.

Suiuant ladite information Arrest s'est ensuiuy audit Parlement de Normandie le 13. Feurier audit an 1593. par lequel ledit d'Alegre, des Angles & autres complices ont esté condamnez à mort: sçauoir ledit d'A-



legre à estre tiré à quatre cheuaux, & ledit des Angles & autres complices rôpus sur vn gril, & tenaillez de fers chauds estans declarez criminels de leze Majesté.

En ensuiuant ledit arrest, ladite Dame a fait faire plusieurs perquisitions pour tascher de faire prendre ledit d'Alegre & ses cōplices. Mais Dieu sçait & tout le public que ledit d'Alegre & ses cōplices se sont retiréz en places fortes, & se sont si bié pris garde qu'il a esté impossible de les pouuoir faire apprehender.

Bien est vray que par hazard quelques vns desdits complices ont esté pris & executez à mort, lesquels ladite Dame pretend, tant par leurs interrogatoires que par leurs testaments ils ont chargé ledit des Angles de la complicité dudit meurtre, sçauoir est Pierre de Fouques, Jean Doubleden & Diego Masurey dit le Cadet la Gloe: leurs depositions & testaments en doiuent faire foy.

Et pour faire voir que leurs depositions sont tres-veritables, ladite Dame demanderesse a produit vn extrait de confession & deposition faicte par Claude Pehu dit la Motte, l'un desdits complices, lors qu'il deut leuer la fierte à Rouën, pour péser se parer dudit crime, par laquelle en mots expres il dit que Beauuais des Angles auoit frappé ledit sieur de Hallot, & qu'il estoit de l'aduis & conspiration dudit meurtre. Cela se void par la lecture dudit extraict approuué de trois officiers dudit Chapitre, non pour s'en penser seruir contre des Angles, mais contre Pehu qui est vn poinct tres considerable. Ioinct que par la confrontation figuratiue qui luy a esté faite dudit de la Motte, il a recogneu auoir veu ledit Pehu chez ledit d'Alegre à Blainville, disant qu'il alloit voir son frere qui estoit page avec ledit de Pehu audit sieur d'Alegre.



Orest-il que par la deposition dudit de la Motte, il a deu declarer qu'estant hors de page dudit sieur d'Allegre, auquel il estoit lors & au temps que ledit frere dudit accusé y estoit, il s'en estoit allé porter les armes avec le sieur de la Falaise, tant au siege de Gournay, qu'à plusieurs & diuers autres lieux au precedent ledit assassinat: aussi il demeure pour constant que Georges de Beauuais frere dudit accusé estoit aussi hors de page auant ledit meurtre puis qu'il portoit les armes lors & au temps qu'il fut tué deuant la maison dudit sieur de la Tourelle, en Ianuier audit an 1592. dix mois auant le mois de Septembre audit an, que ledit meurtre fut commis à Vernon audit feu sieur de Hallot: par consequēt puisque ledit Georges portoit ja les armes auant ledit homicide ledit Matthieu qui estoit son aîné, cōme il le recognoist encore par tous ses interrogatoires deuoit encore estre plus capable de les porter que ledit Georges sō frere.

Demeurant donc d'accord qu'il ne s'est veu autre personne en la compagnie dudit d'Alegre qui s'appellast de ceste qualité de des Angles comme il a confessé auoir esté de sa compagnie, & n'a peu dire qu'il en ait congneu d'autre de ceste qualité avec ledit d'Alegre, & qu'il ayt congneu lesdits le Pehu & ledit Georges son frere page dudit d'Alegre, au temps qu'il estoit de sa compagnie & portant les armes, lesquels étant hors de pages auant ledit homicide, cōme il demeure congneu par le proces. S'ensuit donc qu'il n'y a eu d'autre de ladite qualité des Angles avec ledit d'Alegre que le deffendeur. Ioinct que ledit son frere se faisoit appeller sieur du petit Beauuais, & non des Angles.

L'age que pouuoit auoir ledit des Angles lors du-



5

dit assassinat, est bien iustificié par le procez, tant par vn extrait de baptistère pris au greffe public du Chapitre de Rouën, contenant comme luy & Charlotte sa sœur, puisnée de 4. à 5. ans, donnerét le nom à vn enfant bastard, qui fut enuoyé à son pere par le Sieur de Lanyon son oncle, pour euitier que sa femme tante dudit accusé n'en eust la connoissance que par l'attestation du sieur d'Amy, auquel il a esté Page iusques en l'année 1587. comme il a recogneu par le procez verbal de monsieur Quinet, du 21. iour de Ianuier 1614. qu'il s'en retourna en la maison de son pere, où il print les armes, & s'en alla avec ledit d'Allegre, tant au siege de Dieppe, prise de faux-bourgs de Paris, Louuiers, bataille d'Iury & siege de Rouën, qui ont esté aux années 1588. 1589. 1590. 1591. & finy en Auriil 1592. comme ledit des Angles l'a recognu par certain cayer d'escrits, dont il s'est aydé à l'encontre dudit sieur de Bellefosse, lequel est en la premiere production de ladite dame, & par les cayez des contredits par luy baillez à l'adition de production de ladite dame, où il confesse auoir commandé en chef au camp de la Feire, qui est encor auparauant ledit siege de Roüen, aduenü en l'an 1592. en Auriil.

Ledit des Angles par ledit procez verbal a voulu denier ledit cayer estre de son fait, mais Dieu voulât que la verité ne se puisse cacher, a si bien insité ledit accusé, que luy mesme a produit la coppie d'une sentence interuenüe sur ledit escript, lequel avec les autres est inferé dans ladite sentence, laquelle est de sa production sous la cotte DD.

Outre tout cela, les depositions de Iean de la Vallee, oüy en la premiere information, Iean Braquet & Henry Ruffin oüys en la derniere faite par maistre



Pour iustifier que ledit Georges de Beauuais só frere, n'estoit audit assassinat comme l'a voulu alleguer ledit des Angles, pensant se parer, ladite dame pretend qu'il est raporté par tous les témoins ouïs en l'information faite par ledit Ysnel Cômmissaire du Conseil, que ledit Georges auoit esté tué deuât la maison du sieur de la Tourelle, durât que le siege estoit deuât la ville de Rouën, qui fut posé au mois d'Octobre 1591. & leua ledit siege en Feurier 1592. & que ledit Georges s'apelloit sieur du petit Beauuais & nō des Angles, c'est chose cogneuë à tout le mode. Il estoit donc impossible que ledit Georges fust audit meurtre qui ne fut cōmis qu'au mois de Septébre ensuiuant audit an 1592. Si bié que ledit Georges estoit mort dix mois auparavant que ledit sieur de Hallot, ioint qu'il ne s'estoit iamais appellé de cete qualité de des Angles, que depuis que luy des Angles est tenu prisonnier, ains s'apeloit sieur du petit Beauuais. C'est chose qui est aussi deuëment iustifiée par la deposition de quatre autres tesmoins ouïs par le sieur Bally de Lyons le 2. May 1614. qui disét par mots expres, sçauoir de certain que

ledit sieur de Hallot estoit encor viuant, lors que ledit Georges de Beauuais fut tué audit lieu de la Tourelle. Il ne reste donc qu'à iuger si ledit des Angles, par ses astuces & deneances de la verité se peut faire iuger innocēt au preiudice des charges qui sōt cōtre luy de la cōplicité dudit assassinat déclaré crime de leze majesté par ledit arrest du Parlemēt de Normandie, reitéré par arrest du Roy en son Conseil, du 27 Mars 1593. contre lesquels il n'a pris aucun pouruoy.

[illegible]



